

Tante Hannie

Op weunsdagmiddeg kwam tante Hannie.
Niejt bie uus thuus, mar op de televisie.
Noe hao wielle zelf gêên tante Hannie
In 'n televisie al hêêlemaele nejt,
Mar Human Brêên van hotel Akershoek in z'n café wel.
Dêêr ko j' dan tante Hannie zieje
Ielke weunsdag om vier ure.

Niejt da j' as kind in 't café kwam.
Je bleef voor 't raem in 't sloppie,
In je was dêêr nejt allêene,
Dus was 't zaek om op 'n rennene te zettene,
As ie om half viere de schoolpoorte epasseerd was,
Om in 't sloppie 'n goewd plekkie
voor êên van de raemen te bemachtegen,
zôôda j' tante Hannie teminsten goewd kon zieje.
In dêêr hieng ie dan voor de raemen
Op in an mekaore as 'n soort turnploeg.
Hôôre ko j'ze nôôit, mar 't gezicht was al genoeg.

Laeter hao Flohil van hotel Bellevue,
Wêêr noe de Amrobank stôôt, d'r aok êên.
Dêêr moch ie zelfs nae binne.
In noe ko 'j' 't aok hôôre,
O. wat was dat môôi!
Mar ik bin d'r mar êên kêêr binne eweest.
Toe 'k thuus vertellende hoe môôi dat 't was
In dat sommige kinders voor 'n dubbeltie
'n sukelaoderêêpe ekocht hao, riejp moewder uut:
"Ja, ja, dêêr is ze 't om te doewene,
om zôô geld uut je zak te kloppene
in zelfs kinders al 't café in te lokkene.
Lae 'k 'r niej mêêr van hôôre!"
Zelfs noe nog, 'n halven êêuw laeter
Voewl ik m'n eige soms nog schuldig as ik in 'n café zitte.